



UPA 2014/175  
28.05.2014  
Kalistat Lund

**Apeqquteqaat aallaavigalugu teknologimut nutaamut misileraavimmik assersuutigalugu qillerinernut, avatangiisinik eqqarsaatiginninnermut uuliakoortoqarsimatillugulu saliinermut atatillugu ilinniartinnut, aatsitassarsiornermi ingerlatseqatigiiffinnut kattuffinnullu allanut ilisimatusarnermi, misileraanermi takussutissiornermilu neqeroorfiusartussamik pilersitsinissaq pillugu oqallisissiatut siunnersuut.**

(Inatsisartunut ilaasortaq Naaja H. Nathanielsen, Inuit Ataqatigiit)

Apeqquteqaat aallaavigalugu, Inatsisartunut ilaasortap Naaja H. Nathanielsen-ip, oqallisissiaa, misileraanerni ilisimatusarnernilu assigiinngitsuni nunatta peqataajartuaalersinnaannera siunertaralugu qitiusoqarfimmik ineriartortitsiviusinnaasumik pilersitsinissaq nunatsinni pisariaqartinneqalersimannginnersoq; Inuit Ataqatigiinniit isumaqatigaarput ineriartortinneqarsinnaaneralu piviusorsortutut pisariaqartinneqartutullu isigalugu isummersueqataarusulluta.

Nunarput assigiinngitsutigit ineriartorfiuleruttorpoq. Ineriartornerit pisussat assigiinngitsunut marlunnut immikkoortissinaasavut tassaapput, nunatsinni inuiaqatigiit pisariaqartitsinertik naapertorlugu ineriartortitsinerat aappaattullu nunarsuarmiogattitta nunatta avataanni pisariaqartitsineq aallaavigalugu nunarput iluaqutigalugu ineriartortitsinerat, nunatsinnut aamma sunniuteqartumik. Arlaannaallunniit matumani pigaluarutsigik arlariillutik assigiissutigaat, ilisimasalik ilisimaligassanillu pisariaqartitsinertik.

Soorunami pissusissamisoorpoq uagut maani nunatsinni pisariaqartitatsinnik ineriartortitsinitsinni, ilisimasassat maanni nunami ilisimatusarfigineqarnerisa aamma ingerlanneqartarnissaat. Kisianni aamma soqutigisassaraarput suliffeqarfiit avataaneersut maanni nunami soqutigisaqarlutik ineriartortitsiniartut periarfisaqartinnissaat ilisimasassanik **teknologiimillu** pisariaqartitaminnik maanni nunami ineriartortitsinissaannik.

Ineriartortoqartillugu ilisimatusartoqartuartaussaavoq, minnerunngitsumik maani nunatsinni **aatsitassarsiornerup tungaatigut** annertuumik ineriartortoqartuusaanera ilisimagatsigu nalunngilarput ilisimatusarnerit annertuumik pingaaruteqarlutik inissisimasussaassut.

Ukiuni makkunani nunarput assigiinngitsutigit soqutigineqarluni avatitsinniit malinnaavigineqartualernikuusoq ilisimavarput. Tamanna atorluarlugi suleqatiserinnissutigisariaqarparput aamma ilisimatusarnikkut nunatta inissisimaffiusinnaaneranik takutitsilluta.

Uggornarpoq Naalakkersuisut akissuteqarnerminni, ullumikkut ilisimaneqareersut

saniaSIGUT, ilisimasassanik allanik pisariaqartitsisoqannginneranik nipilimmik oqariartorniarsarimmata, imaluunniit ilisimatusarnerit ineriartortitsinerillu sulif- feqarfissuit akisussaaffigimmatigit uagut qanoq iliuuseqassanngitsugumik nipe- qarmata.

Siunnersuuteqartoq aatsitassarsiorneq uuliasiornerlu annertunerusumik asser- suussiullugit oqallisissiamik saqqummiivoq. Kisianni imaangilaq taakkua kisimik ineriartortinneqarnissamik ilisimatusaanneqarnissamillu siunissami pisariaqartit- sissasut.

Ilisimatusarnerup qiteqarfigisaannik pilersitsisoqarpat nunatsinni periarfissarpasuit ujartuiffiginerullugit ingerlasoqalersinnaannera pisinnaalissagaluartoq qularnan- ngilaq. Nunarpummi aatsitassarsiornermut kisimi killittussaangilaq. Ullumikkut inuussutissarsiutinut ingerlareersunut aatsitassarsiorneq ilaalersussaassaaq, taak- kua saniasigut allanik ineriartortitsisoqarnissaa pisariaqartinneqarpoq.

Ineriartornissamik pilersaaruteqarteqarnissaq takorluugaqartuarnissarlu kinguaas- satsinnut kingornutassiissutissaraarput. Taamaattumik ilisimatusarnikkut killiffim- mik ullumikkut naammaginnilereersimaneq ineriartortitseqqinnissamik kajunger- nermik takutitsisuunngilaq.

Ullumikkut periarfissat atorineqareersut qanoq ineriartorteqqinneqassappat? Nunarput inuussutissatigit imminut napatittoq qanoq anguneqassava? Periarfissarpasuit ullumikkut eqqartorneqartuaraluarlutik uninngaannartut sune- qarumaarpat? Takornariaqarneq qanoq ineriartorteqqissava?

Inuussutissarsiutinut tunngasut suulluunniit apersuutilerneqarsinnaassut qanoq akissutisissavagut piviusunngortitsisinnaannissatsinnut atorsinnaassatsinnik?

Piffissap ingerlanerani nunatsinni paasiniaanerpassuit misissuinerillu ingerlanne- qartuartarsimapput piffissarujussuarmik aningaasarpasuuarnillu nalillit. Ilisimasat ilisimaligassallu aqqissuusaannerusumik ingerlanneqalerpata piviusunngortit- siniartarnerit oqinnerulersussaassapput.

Isumaqarpugut siunnersuuteqartup toraagassatsinnik eqqarsaatissikkaatigit piviusunngortinneqaruni iluaqutaasussamik.